

Youz Aen Gunghyenz Majcaujgyangh

贵港市覃塘区蒙公镇高占小学四年级 Veiz Cinfungh/韦俊锋



Miz ngoenz ndeu dwg singh-gizroek, rumz cififi, nditrongh raeuj-rub, dauqcawq va rang roeg hemq, gou caeuq daxboh daxmeh bae Gunghyenz Majcaujgyangh guhcaemz.

Yamq haeuj bakdou, heux gvaq gizdieg dingz ci, couh daeuj daengz diuz roen rinmaxluenx lo. Loh din caij

youq gwnz rinmaxluenx, liengzsis, youh lumj miz vunz bang daejdin mwngz gaeu humz, gejlai mizyinx ha! Bouxlaux ciengzseiz daeuj byaij ne!

Caij byaij baenaj couh daengz aen giuz ndeu, heuhguh “giuz ingj ndwen”. Dingqgangj moix daengz

ronghndwen ndwennduemj seiz, daengx ranz vunz youq gwnz aen giuz neix guhbaiq, siengj gijmaz couh ndaej gijmaz bw.

Byaij gvaq giuz, couh daeuj daengz giz diegnywj gvangqmyang-myang ndeu, gwnz diegnywj gejlai nauhyied ha: Gyoengq vunz miz mbangj angq cuengq yihrumz, miz mbangj comz youq guhdoi dwk bej, miz mbangj doxgangj riuhaha, bouxboux cungj vuenyungz raixcaix!

Daj diegnywj byaij sat ngeux haeuj baihgvaiz, couhwdg gizdieg lwgnyez guhcaemz lo. Baihndaw miz feihgih, bungbungceh, dwk lanzgiuz, gueng bya……Gou cei qyaez naengh ruzcaeghaij. Hoeng, gizneix vunz lai lai lo. Gou caeuq daxboh baiz doih cawx biuq, caj haujlai nanz cij daengz.

Baez cawx ndei biuq, gou sikhaek buet coh ruzcaeghaij, genj naengh baiz cei doeklaeng. Daxboh sing iq naeuz: “Daeglwg ha, naengh baiz cei doeklaeng, gingyiemj raix-caix, mwngz mbouj lau ha?” Daxmeh

heuh gou naengh youq baiz cungq-gyang. Gou bek najaek riu naeuz: “Mbouj, mbouj, lau gijmaz ha, yied gingyiemj yied mizyinx ne!” Gou caeuq daxboh naengh ndei lo, daxmeh mbouj dingz bang dou ingj siengq. Aen ruzcaeghaij menhmenh bibuengq lo, daih’it baez naengh cungj ruz neix, sim gou gejlai gikdoengh ha! Aen ruzcaeghaij yied bi yied sang, yied bi yied vaiq, gyoengq doih gwnz ruz angq hemq mbouj dingz, daengz giz cei q sang seiz, gou baez yawj coh baihlaj, roxnyinh miz di lau, couh fwt hemq hwnjdaej: “A, gouqmingh ha!” Caj yaep ndeu, aen ruzcaeghaij couh dingz roengzdaej lo. Gejlai mizyinx ha, gou ndaej naengh gvaq sim’ angq ne!

Daengz bangaiz lo, dou sij mbouj ndaej lizhai lo. Aen Gunghyenz Majcaujgyangh, mwngz caen gyaen-ndei! Baezlaeng gou lij caij daeuj mwngz gizneix guhcaemz bw!

(lauxsae son’ gyaug: Couh Yuz/周旭)

Daegnuengx Dwg “Vuengz Buqvaih”

上林县大丰镇中心学校五(2)班 Veiz Loz/韦乐

Gou miz daegnuengx ndeu, de gig ndei-gyaez, danhseih hix gig manz. Dwg boux “vuengz buqvaih” okmingz.

Miz baez ndeu, daxdaiq cawx geij duz bya ma ranz, gou caeuq daegnuengx angq raixcaix, couh caemh gvaqbae yawj. Gij bya neix youq ndaw raemx swyouz cwxcaih dwk youz bae youz dauq, gig vaiqvued ha! Daegnuengx siengj iet fwngz lumh bya. Gou lanz de naeuz: “Mbouj ndaej, gij bya neix deng doeksaet, yaek haeb vunz bw.” Daegnuengx yied dingq yied roxnyinh geizheih, mbouj dingq vah, couh iet fwngz bae lumh duzbya, fwngz de baez bungq deng rieng bya, bya deng haep le dauqcawq bongh bae bongh dauq, lij bungq deng fwngz daegnuengx, daegnuengx “a” sing ndeu couh riengj suk fwngz dauqma, byawz rox, mbouj siujsim deng doengj laemx lo. “A!” gou caeuq daegnuengx haep dwk hemq hwnjdaej. Daxdaiq dingqnyi le, sikhaek gvaqdaej yawj, hojsik bya gaenq swnh miengraemx lae deuz lo. Dou haemh haenx couh mbouj miz bya gwn lo.


Lij miz baez ndeu, daxdaiq rag ci byaek rim ndeu daj ndaw naz dauqma. Deng ginggvaq aen bo raezrangrang ndeu. Daxdaiq rag ndaej gig dwgrengz, heiq conhfofo, hanh lae mbouj dingz. Daegnuengx yawjraen le, couh buet bae bang doi. Hoeng ci gaenq doi hwnj daengz dingj bo, daegnuengx lij haenq rengz doi ci, doeklaeng ci vaiq lai lo, daxdaiq cap ci mbouj dad, gig mbouj yungzheih ci doi hwnj gwnz bo lo, youh yienghneix daj henz bo ringx fan lo. doeklaeng ci vaih lo, byaek sanq liux lo. Daegnuengx caen dwg guh gienh “saehndei hung” ndeu.

Miz gienh saeh ndeu cei q hawj gou haeb

heuj yaek dub de geij mbat ndeu. Bi’ gvaq seizhah, mbwn ndat baenz youq gwnz namh cien gyaeq ndaej cug bae. Sietdiuz ngamq dawz okdaej mienh gwn mienh yungz. Bohmeh raen dou song beixnuengx ndat baenz ndoj youq ndaw ranz gunghdeuz hix mbouj sangj, couh hawj dou cawx aen youzyungjiciz cungheiq ndeu, dou angq raixcaix. Daengzlaeng miz baez ndeu, gou caeuq daegnuengx doq youzraemx doq gwn giigwn ringgangq, daegnuengx gwn liux le yaek dawz cukcien bae vut, byawz rox deng daemjndoet, laemx roengz raemx bae, ndaw fwngz cukcien baek vaih youzyungjiciz, youzyungjiciz couh laeuh heiq, mbaep lo, raemx lae okdaej lo. Yawjraen yienghneix, gou huj dwk yaengx gaemxgienz coh daeg-nuengx.

Daegnuengx gou caen dwg boux “vuengz buqvaih” dahraix. Dangyienz, hix dwg aenvih de, gij saedceij gou cij bienq ndaej fungfouq lailai.

(lauxsae son’ gyaug: Mungz Cwngzgen/蒙成建)



Hong

Gou dawz sa dauqma ndaw ranz, dwk haeuj ndaw habhojcaiz bae, mwngz couh guhneix naeuz: “Guhneix mbouj ndei lo, gyuek deihsan bw.”

Meh goj ciengzseiz dawz sa haeuj ndaw ranzbanhgoeng bae, de dawz sa coq haeuj ndaw bingzgingq iq baij rim gwnz daiz de bae. Boh ha, boh vihmaz cungj mbouj naeuz meh yienghneix guh mbouj ndei, gyuek aendaiz ne?

Mwngz naeuz, doenghgij bingzgingq duh meh heuhguh batdajndaem, sa ndawde dwk miz haujlai cungj cehfaen ywdoj, hawj gyoengqde did nyod, maj baenz gomiuz—nyaenx dwg hong meh.

Hoeng, boh ha, neix goj dwg hong gou bw! Lwg mbouj miz doenghgij batdajndaem aeu gingq guh de, miz habhojcaiz ndwi; hoeng sa ndaw habhojcaiz duh gou goj dwk miz lailai cungj rinreq bw, saek gijmaz cungj miz caez—doenghgij rinreq de lij dwg daj haenzrai q gip dauqma bw! Gou goj yaek hawj gyoengqde did nyod, maj baenz faexlwg, daengzcog couh baenz lailai ndaek rinreq gyaundeit.

(Daj《Bonjsei Sim Lwgnyez》(Veiz Gizlinz raiz) senj okdaej, Lwgfwnzme/卢奋长 hoiz)